

周禮完解

周禮完解卷九

郝敬習

秋官司寇第五

秋摯也。採取收斂之意。物至秋而收。天氣始肅。故司寇爲刑官。寇害也。物成曰害。何也。物成不以春夏雨露。以秋霜刑。斯成之。利斯害之。凡利所在。不期寇而寇至。故司寇。秋官也。其次司馬。何也。道之以政。齊之以刑。六師所征伐。皆已蕩平。罪人得而國憲彰。如九夏炎烝。而涼風至也。蓋水土之氣。冲和于東春。發揚于南夏。轉而西適。木遇金傷。火遇金革。坤土當西南。

之交金氣得養左母右父履坤戴乾故保定堅固莫如金其森爽清寧之氣莫甚于西而天地定位帝王功成故刑者成也詩云不顯維德百辟其刑之君子篤恭而天下平刑成而後平也周之王業成于西土故行人司儀統于秋而周禮大備夏官效地之用職方山原所以終地秋官贊春之功行人司儀所以成春天無爲而冬考成皆四官之力以斯謂之辨方正位也

惟王建國辨方正位體國經野設官分職以爲民極乃立秋官司寇使帥其屬而掌邦禁以佐王刑邦國

禁止也。止則成矣。刑形也。形成也。凡物刑之而後成。形如禾刈則成穀。果剝則成實。土範金則成器。凡物不毀不成。世道不亂不治。不桀紂無湯武不征伐無太平。故萬寶告成于秋。司寇繼司馬也。

刑官之屬

刑官卽大司寇屬。謂小司寇以下六十六職。

大司寇卿一人。小司寇中大夫二人。士師下大夫四人。鄉士上士八人。中士十有六人。旅下士三十有二人。府六人。史十有二人。胥十有二人。徒百有二十人。

士察也。師長也。刑官稱士見理明也。臯陶九德見知。

爲虞士所以明允鄉士聽畿內六鄉之訟者

大司寇之職掌建邦之三典以佐王刑邦國詰四方一
曰刑新國用輕典二曰刑平國用中典三曰刑亂國用
重典以五刑糾萬民一曰野刑上功糾力二曰軍刑上
命糾守三曰鄉刑上德糾孝四曰官刑上能糾職五曰
國刑上愿糾暴

典常也常刑曰典詰窮究也新國新建之國民未習
教故用刑宜輕平國承平之國民已習教用刑惟中
亂國叛逆之國不大懲不知反正故刑重糾約束也
野刑刑民之不任職者上尚同所尚在功糾其不與

力以儆惰也。軍刑。軍伍之刑。所尚在用命。糾其不死。
守以飭武也。鄉鄉三物。弼教之刑。所尚在德。糾其不
孝。以勵人倫。官刑。官府之刑。所尚在能。糾其不盡職。
以儆官邪。國刑。立國之刑。所尚在謹厚。糾其狂暴。以
正風俗。

按刑者。聖人不得已而用之。其用之也。本欲輕之。輕
之而不可得。則權宜適中。惟明惟允。新國用輕。亂國
用重。豈不刊之典與。夫墨劓宮剕辟。先王所謂五刑
也。而大司寇易爲野軍。鄉官國親義序別信。先王所
謂五禮也。而大宗伯易爲吉凶。軍賓嘉大抵皆以名。

法變幻使人踴疑似是縱橫之習氣也

以園土聚教罷

皮

民凡害人者寘之園土而施職事焉

以明刑恥之其能改者反于中國不齒三年其不能改而出園土者殺以兩造禁民訟入束矢於朝然後聽之以兩劑禁民獄入鈞金三日乃致于朝然後聽之

園土獄城也罷民囚禁困罷之民施職事如後世城旦舂鬼薪之類困苦之使改悔也明刑以木書其所犯罪狀梏于頸以愧恥之中國猶國中故里也反謂役滿還鄉不齒不得以年次列于衆中不改而出園土謂逃亡也兩造告人者與告于人者並造庭也束

矢百矢矢象直訟者與被訟者至各入束矢于官自表其直而後受其辭不入矢者自服不直故不聽也凡公署皆曰朝爭辨曰訟訟成曰獄對質兩辭曰劑鈞三十斤金銅鐵之屬三日乃聽俟其中悔也致于朝召訟者于官也必使入束矢所以難其聽而禁民訟也必使入鈞金所以難其聽而禁民獄也

按束矢鈞金之法因訟以爲利耳使民無訟者不爲吳澄氏曰古有贖刑爲過誤可赦者設不聞凡獄訟皆入矢與金也先王爲弓矢各有司存戎器不粥于市民何從得束矢貧者何能備鈞金必矢與金然後

聽則富者先訟貧者寃阻上達矣夫所謂兩造者兩訟之人至于前而折曲直也兩劑者兩人所書之辭款也既有兩造之人必有兩劑之辭何乃分而爲二一使之入矢一使之入金乎鄭氏云訟以財貨相告獄以罪名相告夫民之爭辨皆訟也既訟而繫繫皆獄也必財貨相告謂訟則凡以他事告者不謂之訟乎訟必有罪何獨以罪名獄乎

以嘉石平罷民凡萬民之有罪過而未麗於灋而害於州里者桎梏而坐諸嘉石役諸司空重罪旬有三日坐替役其次九日坐九月役其次七日坐七月役其次五

日坐五月役其下罪。三日坐三月役使州里任之則宥而舍之以肺石達窮民。凡遠近惇獨老幼之欲有復於上而其長弗達者立於肺石三日士聽其辭以告於上而罪其長。

坐罪人之石名嘉卽後世以囹圄爲福堂之意。先王之刑民無非欲民爲善耳。平成也。罷民解見上有罪過謂無知誤犯也。未麗于法刑不至于園土之重也。害于州里罪不至于害州里也。木在足曰桎在頸曰梏。梏卽所謂明刑。鄭謂桎在手坐諸嘉石坐限滿乃役諸司空以坐之日爲役之月旬有三日當爲旬有

二日役畢必使州里人保任之不復犯然後縱舍之以肺名石取赤誠不妄之意其長謂所屬官司如鄉遂大夫之類

按嘉石肺石鄭氏謂設于外朝門左右堯舜在上不能去殺一歲所犯所告不知幾罪人填集外朝二石不足以容之國家有大體明刑有司寇必欲以一人詳鞠天下刑獄日亦不足此等規模名法豈周公制作不可欺智者

正月之吉始和布刑于邦國都鄙乃縣刑象之鑒于象魏使萬民觀刑象挾日而斂之凡邦之大盟約泣其盟

書而登之于天府。大史內史司會及六官皆受其貳而藏之。凡諸侯之獄訟以邦典定之。凡卿大夫之獄訟以邦灋斷之。凡庶民之獄訟以邦成弊之。大祭祀奉犬牲。若禋祀五帝則戒之日。涖誓百官戒于百族及納亨。前王祭之日亦如之。奉其明水火。凡朝覲會同前王大喪亦如之。大軍旅涖戮于社。凡邦之大事使其屬蹕。

正月以下至斂之解見大宰盟約所以糾衆司寇掌之盟書盟誓之辭天府祖廟之藏大史內史司會皆掌典法則六官卽六卿司寇涖盟書而六官與大史等皆受其副而藏之示共守也邦典卽天官六典待

邦國之治。故以定諸侯之獄訟。邦灋。卽天官八灋。待官府之治。故以斷卿大夫之獄訟。邦成。卽天官八成。待萬民之治。故以弊庶民之獄訟。弊。斷也。犬屬戌。故秋官奉之。戒之日。始齋戒之日。誓百官使齋戒也。百族。謂同姓。郊特牲云。戒百官于庫門之內。戒百姓于大廟。是也。納亨。將祭致牲前王。引導王祭之日。旦明行禮之日。如之。亦前王也。陰鑑取水于月。曰明水。陽燧取火于日。曰明火。以給烹爨。司寇奉之。取秋氣清明。皆方位之義。大事皆司寇前王。取嚴肅之義。小司寇之職。掌外朝之政。以致萬民而詢焉。一曰。詢國。

危二曰詢國遷三曰詢立君其位王南鄉向三公及州
長百姓北面羣臣西面羣吏東面小司寇擯以敘進而
問焉以衆輔志而弊謀

小司寇職見上中大夫二入外朝在雉門外致召集
也詢諸訪也國危謂敵難國遷謂遷國立君謂擇繼
三公鄉老也州長鄉大夫六卿也百姓萬民也羣臣
諸大夫士也羣吏府史以下擯揖之使前也輔志輔
王志弊謀斷謀也

以五刑聽萬民之獄訟附于刑用情訊之至于旬乃弊
之讀書則用灋凡命夫命婦不躬坐獄訟凡王之同族

有罪不卽市以五聲聽獄訟求民情一曰辭聽二曰色聽三曰氣聽四曰耳聽五曰目聽以八辟麗邦灋附刑罰一曰議親之辟二曰議故之辟三曰議賢之辟四曰議能之辟五曰議功之辟六曰議貴之辟七曰議勤之辟八曰議宥之辟以三刺斷庶民獄訟之中一曰訊羣臣二曰訊羣吏三曰訊萬民聽民之所刺宥以施上服下服之刑

五刑卽野軍鄉官國五附于刑有罪當刑也用情愼重也訊問也十日而後斷愼之至也讀書考刑書命夫男子貴者命婦貴人妻坐跪也凡獄訟者必坐對

不躬坐使其屬代也。王族有罪，刑于甸師，不卽市也。五聲，辭氣也。辭聽理，屈則辭窮；色聽情，愧則色赧；氣聽中，怯則氣餒；耳聽心，惑則聽亂；目聽志，懾則視昏。辟，法也。麗，附也。議，辟法所不得行爲議處也。親，王之親戚。故王之故舊賢素有德者，能素有材者，功有勲績者，貴居高位者，勤勞于國事者，實王之所不臣者，八者皆法所當議也。刺，猶殺也。獄訟之中，謂刑中其罪也。民所欲刺，乃刺之。所欲宥，則宥之。上服，被重刑。下服，被輕刑。孟子云：善戰者服上刑，鄭謂上爲墨劓。下爲宮刑，恐非。

及大比登民數自生齒以上登于天府內史司會冢宰
貳之以制國用小祭祀奉犬牲凡禋祀五帝實鑊水納
亨亦如之大賓客前王而辟后世子之喪亦如之小師
泣戮凡國之大事使其屬蹕孟冬祀司民獻民數於王
王拜受之以圖國用而進退之歲終則令羣士計獄弊
訟登中于天府正歲帥其屬而觀刑象令以木鐸曰不
用濫者國有常刑令羣士乃宣布于四方憲刑禁乃命
其屬入會乃致事

大比三年大較民數之消長男子八月生齒女子七
月生齒生齒而後體備故登其數于天府內史掌八

柄之籍司會主會計冢宰長六官故皆取其民數之副民數定則可以任職貢賦制國用矣納烹亦如之謂殺牲亦須水也前王而辟開道也小師命將征伐也司民星名解見春官天府之職圖國用謂民衆則賦益用饒民少則賦減用縮故進退之也今羣士令其所屬遂士以下登中登一歲所斷刑獄之中憲懸示也刑禁卽五刑五禁乃命其屬入會承歲終計羣士而言先得其屬之計乃令致其事于王

按六官之事多錯舉卽天官所謂官聯也意主縱橫不在分疏而儒者以一隅求之多舛迂不合或疑登

民數祀司民祭祀賓客喪紀非司寇之事夫世儒所謂司寇者刑法之官而是書所謂司寇則天地之秋也天地氣凝于秋春夏成功于秋王制云刑者側也側者成也一成而不可變非殺人之謂也故登民數者秋成之象祭祀奉犬者戍守之象禋祀奉水者金生之象賓客喪事前王者肅清之象師旅蒞戮大事使蹕者嚴厲之象凡是書所以設官分職寓其意通其謀耳非區區典守尸祝不越俎之謂也不喻此旨不可與讀此書

士師之職掌國之五禁之灋以左右刑罰一曰宮禁二

曰官禁三曰國禁四曰野禁五曰軍禁皆以木鐸徇之于朝書而縣于門閭以五戒先後刑罰毋使罪麗于民一曰誓用之于軍旅二曰誥用之于會同三曰禁用諸田役四曰糾用諸國中五曰憲用諸都鄙

士師職見大司寇下大夫四人也左右猶佐佑宮王宮官官府國城中野郊遂軍行伍戒猶禁也先後猶左右毋使罪麗于民戒勿犯也以言折曰誓以告曰誥軍旅曰誓會同曰誥田役曰禁國中曰糾都鄙曰憲憲縣示也其爲戒一也

按五禁五戒目重複而禁糾憲三者強配湊數未見

其合

掌鄉合州黨族閭比之聯與其民人之什伍使之相安
相受以比追胥之事以施刑罰慶賞掌官中之政令察
獄訟之辭以詔司寇斷獄弊訟致邦令掌士之八成一
曰邦洊酌二曰邦賊三曰邦謀牒四曰犯邦令五曰矯
矯邦令六曰爲邦盜七曰爲邦朋八曰爲邦誣若邦凶
荒則以荒辯之湮治之令移民通財糾守緩刑凡以財
獄訟者正之以傅別約劑

鄉合六鄉合聚州黨族閭比相聯卽合也一比爲伍
二伍爲什以至二千五百家爲州萬二千五百家爲

鄉所謂相安相受也。追追盜胥相也。追胥有警相追捕也。有功則慶賞。失事則刑罰。官中大司寇官府中凡獄訟士師察之。告于司寇斷之。皆士師致之也。成獄成不可易者大罪也。害及邦國故罪大獄成而不變。灼酌也。謂本國之臣酌取邦國機密洩之敵人。叛逃曰賊。謀敵人來爲間謀。矯矯通詐稱王命曰矯。邦盜竊國寶邦朋比周爲黨。邦誣左道惑衆荒辯之灋。卽移民通財糾守緩刑治財訟辯別區處之法。年荒多以財訟者。傳別一券中分各執爲信。約劑卽券也。訟財者以此正之。皆所謂荒辯也。鄭云辯作貶減損。

意

若祭勝國之社稷則爲之尸王燕出入則前驅而辟祀五帝則沃尸及王盥洎鑊水凡刲犧珥則奉犬牲諸侯爲賓則帥其屬而蹕于王宮大喪亦如之大師帥其屬而禁逆軍旅者與犯師禁者而戮之歲終則令正栗會正歲帥其屬而憲禁令于國及郊野

勝國周所勝之國謂殷也勝克也刑主克故祀亡國社稷以刑官爲尸鄭謂畧之非也王燕出入王燕間行幸也辟開道也沃尸酌水尸盥也洎鑊水增水于鑊使熱也刲珥猶割耳珥作珥凡釐禮割牲耳取其

血割犬則士師奉之鄭註毛曰刳羽曰鉅諸侯爲賓
謂饗于廟燕于寢帥其屬謂鄉士以下大師王親征
也正會要治計簿也

鄉士掌國中各掌其鄉之民數而糾戒之聽其獄訟察
其辭辨其獄訟異其死刑之罪而要之旬而職聽于朝
司寇聽之斷其獄弊其訟于朝羣士司刑皆在各麗其
瀆以議獄訟獄訟成士師受中協日刑殺肆之三日若
欲免之則王會其期大祭祀大喪紀大軍旅大賓客則
各掌其鄉之禁令帥其屬夾道而蹕三公若有邦事則
爲之前驅而辟其喪亦如之凡國有大事則戮其犯命

者

鄉士職見大司寇掌百里內六鄉之獄云國中者六鄉獄在城中上下士五十六人分掌故言各辨其獄訟謂獄成有寃者辨之死刑則異別而要劾之遲十日乃以其職對衆吏聽于外朝司寇覆聽遂斷決也各麗其淒羣士司各以所見合律議之士師司寇之貳受中猶受成協日擇用刑之日肆陳尸市朝免赦也王會其期當司寇與羣吏聽之日王親會也大祭祀四者王有事于六鄉也三公有邦事以王事入鄉其喪謂三公喪亦如之亦前驅辟道也

按死刑欲免則王會其期豈天子以私意免罪人乎抑以其罪疑而免之乎罪疑而免則羣士司刑在王不必會如以私意縱罪人而親往不可以爲訓

遂士中士十有二人府六人史十有二人胥十有二人徒百有二十人

掌六遂之訟

遂士掌四郊各掌其遂之吏數而糾其戒令聽其獄訟察其辭辨其獄訟異其死刑之罪而要之二旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日就郊而刑殺

各於其遂肆之三日。若欲免之。則王令三公會其期。若邦有大事。聚衆庶。則各掌其遂之禁令。帥其屬而蹕。六卿若有邦事。則爲之前驅而辟其喪。亦如之。凡郊有大事。則戮其犯命者。

掌王畿百里外。至三百里內。六遂之獄。云四郊者。六遂在四郊。死刑要之二旬。而後聽于朝者。六遂遠更遲十日也。王令三公會其期。遠故不親會。六卿有邦事。遠故不使三公。其喪。謂公卿大夫喪。郊有大事。謂六遂民從軍田役等事。鄉在內曰國。遂在外曰郊。縣士中士三十有二人。府八人。史十有六人。胥十有六人。

人徒百有六十人

距王城三百里至四百里曰縣縣士掌其獄

縣士掌野各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役聚衆庶則各掌其縣之禁令若大夫有邦事則爲之前驅而辟其喪亦如之凡野有大事則戮其犯命者

郊外曰野遠郊二百里外縣地通謂野死刑三旬而

後聽于朝。縣地愈遠也。王令六卿會。公會近。卿會遠。大夫有邦事。縣遠使大夫。

方士中士十有六人。府八人。史十有六人。胥十有六人。徒百有六十人。

掌四方都家之獄。

按自鄉士至方士。環千里內。獄吏至百有十人。府史以下六百二十人。中朝與遠方尚不與。豈先王之世。訟獄之多如此乎。

方士掌都家聽其獄。訟之辭。辨其死刑之罪而要之。三月而上獄。訟于國。司寇聽其成于朝。羣士司刑。皆在。各

麗其灋以議獄訟。獄訟成，士師受中，書其刑殺之成，與其聽獄訟者。凡都家之大事，聚衆庶，則各掌其方之禁令，以時脩其縣灋。若歲終，則省之而誅賞焉。凡都家之士所上治，則主之。

王畿四百里外，至五百里，王子弟公卿采地，家大夫采地，皆在焉。大都在畺地，小都在縣地，家邑在稍地，皆方士掌其獄訟。此不言民數，民不屬王也。三月而後，上于國，遠也。士師受成，不言協日刑殺，都家吏自刑殺也。士師但書其成，與聽斷之吏備攷。大事聚衆，謂王有征伐田役之事。縣灋，謂地官縣師之灋。辨郊

野地域稽夫家人民六畜車輦之類都家之士所上治謂獄訟小事則方士主之

訝士中士八人府四人史八人胥八人徒八十人

訝迎也掌治遠方獄訟

訝士掌四方之獄訟諭罪刑于邦國凡四方之有治於士者造焉四方有亂獄則往而成之邦有賓客則與行人送逆之入於國則爲之前驅而辟野亦如之居館則帥其屬而爲之蹕誅戮暴客者客出入則道之有治則贊之凡邦之大事聚衆庶則讀其誓禁

四方謂諸侯之國諭罪刑謂以麗罪制刑之意曉諭

邦國四方有疑獄求治于士師者先造訝士乃爲之通諸侯之國有亂獄訝士往平之刑官主賓客秋方本賓位也暴客賊害賓旅者有治謂賓有禮事則贊助之大事謂王征伐等事

朝士中士六人府三人史六人胥六人徒六十人

掌外朝之事

朝士掌建邦外朝之灋左九棘孤卿大夫位焉羣主在其後右九棘公侯伯子男位焉羣吏在其後面三槐三公位焉州長衆庶在其後左嘉石平罷民焉右肺石達窮民焉帥其屬而以鞭呼趨且辟禁慢朝錯立族談者

鄭氏曰王有五門三朝自外入一曰皐門二曰庫門
三曰雉門四曰應門五曰路門路門卽尚書顧命所
謂畢門也雉門次五門中兩觀左廟右社在焉三朝
庫門外爲外朝路門外爲中朝路門內爲內朝卽路
寢之前廷此朝士掌庫門外朝也棘棘樹取赤心外
刺槐懷也取懷遠孤卿大夫臣道也比諸侯爲卑故
西向公侯伯子男君道也比羣臣爲尊故東向羣士
謂上中下士羣吏謂府史輩面猶前也三公前列領
州長衆庶答天子也嘉石肺石見大司寇嘉石左肺
石右右伸左詘地道尊右卑左也帥其屬其徒六十

人也。鞭執以爲威，呼呵呼趨，疾行辟辟，人慢朝臨朝，不敬者，錯立聚談，皆慢也。

按鄭氏五門三朝，皆以臆說。臯門卽今都城南門，庫門在其內，朝卽在庫門外，是城門內卽朝署也。魯有庫門雉門，蓋因地立名，卽以配臯門。路門爲王門之通稱，義未甚協。九棘三槐，嘉石肺石，皆似後人創造。詩書無明徵。

凡得獲貨賄，人民六畜者，委于朝，告于士，旬而舉之。大者公之，小者庶民私之。凡士之治有期日，國中一旬，郊二旬，野三旬，都三月。邦國朞，期內之治聽，期外不聽。凡

有責者有判書以治則聽凡民同貨財者令以國褻行之犯令者刑罰之凡屬責者以其地傳而聽其辭凡盜賊軍鄉邑及家人殺之無罪凡報仇讐者書於士殺之無罪若邦凶荒札喪寇戎之故則令邦國都家縣鄙慮刑貶

得獲獲亡失物人民謂子女凡得遺失物委于朝待求者識之十日無識者取之舉猶取也大物入官小物與民士治有期日卽上章鄉遂士獄成職聽于外朝遠近皆有期日國中卽鄉士獄期一旬聽近也郊二旬遂士獄野三旬縣士獄都三月方士獄邦國替

訝士獄期外不聽惡其怠事也責債也凡以債責償
必有分券可治則聽之同貨財富人以財貨斂放與
人取息者令以國賦什一之法行之卽地官泉府職
民之貨以國服爲之息過什一則刑罰之屬責謂以
財物屬託人索還者地傳謂比鄰託財必有近鄰爲
證乃可聽盜賊軍鄉邑家人謂羣盜稱兵害鄉里人
家人皆得殺之無罪也仇對也讐怨也謂所對敵怨
恨之人如殺人父兄其子弟圖報之類必先書其事
告于朝士則殺之不罪也慮刑貶議省刑也貶猶損
也

按士治有期是已過期則罰其士可也并其獄不聽如罪人何民苟有必報之讐書于士士當爲治之苟不察真僞但書則聽其人殺之安知見殺者之果有罪乎凡此皆不可爲訓

司民中士六人府三人史六人胥三人徒三十人

掌萬民之數民數不以屬司徒而屬司寇者秋官主成也

司民掌登萬民之數自生齒以上皆書於版辨其國中與其都鄙及其郊野異其男女歲登下其死生及三年大比以萬民之數詔司寇司寇及孟冬祀司民之日獻

其數于王。王拜受之。登于天府。內史司會冢宰貳之以贊王治。

登下生者升之死者除之。孟冬祀司民小司寇之職。見春官天府。

按養民者不使登民數防其僞也。刑民者屬以生齒教之仁也。凡物春夏升長多寡之數不可知。至于秋則豐約可見。故天道不以雨露慶霜雪。明主不以姑息廢勵精。作者自有意。儒者謂錯亂欲改而他屬。非也。

司刑中士二人。府一人。史二人。胥二人。徒二十人。

掌肉刑

司刑掌五刑之灋以麗萬民之罪墨罪五百劓罪五百宮罪五百剕罪五百殺罪五百若司寇斷獄弊訟則以五刑之灋詔刑罰而以辨罪之輕重

墨黥也以針刻面室以墨劓截鼻也宮男割勢女閉宮中則斷足卽臙也殺死刑也五者古所謂肉刑各五百所犯異而刑同也

按五刑始于蚩尤之五兵其遺種爲苗民周書穆王詰詳已故書錄其辭儒者併肉刑以爲聖王之典不可除豈獨無惻隱之心蔽于是書之爲周公耳

司刺下士二人府一人史二人徒四人

刺殺也

司刺掌三刺三宥三赦之灋以贊司寇聽獄訟壹刺曰訊羣臣再刺曰訊羣吏三刺曰訊萬民壹宥曰不識再宥曰過失三宥曰遺忘壹赦曰幼弱再赦曰老旹三赦曰惇愚以此三灋者求民情斷民中而施上服下服之罪然後刑殺

臣吏民皆曰可殺又以宥赦之灋議之仁之至也不識如生長他鄉不識所親以甲爲乙報讐誤殺之類過失如舉刃斫伐他物誤中人之類遺忘如惟薄外

周禮卷之六 考工記 二
投射忘有人在之類三者非故犯可寬宥也年小微弱年老昏耄頑蠢癡愚三者情可矜當赦除之以此刺宥赦三法求民情斷民所犯之中施以上服下服之罪服被也上服重罪下服輕罪得情允中輕重適量然後刑殺慎之至也

司約下士二人府一人史二人徒四人

約如漢約法三章之約今甲之類

司約掌邦國及萬民之約劑治神之約爲上治民之約次之治地之約次之治功之約次之治器之約次之治人
之約次之凡大約劑書於宗彝小約劑書於丹圖若

有訟者則珥而辟藏其不信者服墨刑若大亂則六官辟藏其不信者殺

約劑與衆約其事刻其辭以爲質約必要神故神約爲首治者理其不齊神約如郊社羣望宗廟祀典之序民約謂賦稅征役編戶刑律之條地約如鄉遂縣都井牧田萊之等功役如王功國勲頒爵行賞之次器約如宮室車旗服色之品摯約謂上下交際玉帛禽鳥之數大約劑謂邦國要典宗彝宗廟法器書于宗彝質之鬼神示守也小約劑萬民之期會丹圖信丹書書以丹示赤誠也訟不如約而訟珥珥通割牲

耳取血告神也辟藏開其所藏約書緝而後開神之
也不信理屈不如約者被以墨刑不信書故墨之大
亂謂僭越大典六卿共開約質之殺不如約者

司盟下士二人府一人史二人徒四人

噤血誓曰盟

司盟掌盟載之灋凡邦國有疑會同則掌其盟約之載
及其禮儀北面詔明神既盟則貳之盟萬民之犯命者
詛其不信者亦如之凡民之有約劑者其貳在司盟有
獄訟者則使之盟詛凡盟詛各以其地域之衆庶共其
牲而致焉既盟則爲司盟共祈酒脯

盟者殺牲取血塗口旁書其約辭載于牲上爲坎埋之盟載之法也邦國有疑謂諸侯有貳心王于會同盟之貳之謂寫盟辭爲副以藏也萬民犯命者亦盟之其不信盟者詛于神禍之亦如之亦掌其禮儀詔神貳之也凡民有約劑卽司約職云治民之約與小約劑書于丹圖者司約書其副以與司盟有違約相訟者使盟而詛之地域謂訟者所居邑閭致猶送也司盟旣爲衆盟又以酒脯自祈福于神亦地域之衆供之

按先王以仁義忠信化民而民心服故言而民莫不

信令而民無不從其信從非以令與言也有不言而信不令而喻者故曰善約者無繩墨而不可解四海之大億兆之衆人各有心苟實意不孚雖父子兄弟不能相保泥以狙詐之虛辭徼神歆血以求民不二是緣木求魚也夫朝廷有約束與民共守布大公也不信者誅明大法也今犯命者不能正法而詛之以鬼獄訟者不能明斷而乞靈于神攜貳者不能懷集而要結以誓則是國家無典刑相習爲狙詐怪誕而已烏足以聰億兆治天下乎

職金上士二人下士四人府二人史四人胥八人徒八

十人

罪入罰金故職金掌之金秋氣也屬秋官

職金掌凡金玉錫石丹青之戒令受其入征者辨其物之姦惡與其數量楊而璽之入其金錫于爲兵器之府入其玉石丹青于守藏之府入其要掌受士之金罰貨罰入于司兵旅于上帝則共其金版饗諸侯亦如之凡國有大故而用金石則掌其令

入征謂納貢楊標記之璽印識之爲兵器者攻金之工冶氏桃氏之屬守藏玉府內府也入其要入凡數于大府也金罰贖罪之金貨罰準金之貨入司兵充

置造之費金版金爲葉大祭書祝辭大饗賓客書策
命也國有故寇戎之類用金石兵器之類

司厲下士二人史一人徒十有二人

厲惡也禁無良者

司厲掌盜賊之任器械貨賄辨其物皆有數量賈而楊之
入于司兵其奴男子入于罪隸女子入于春槩凡有爵
者與七十者與未亂者皆不爲奴

任器任用之器械貨財所盜財物賈而楊之辨其價
值記之入于司兵給治兵器之費奴謂犯重罪者之
家屬入官爲奴罪隸卽司隸所屬百二十人之輩

橐司徒之屬春人橐人女奚單也有爵命士以上也
亂毀齒也男八歲女七歲則毀齒

按古者罰弗及嗣文王之治岐也罪人不孥有罪者
誅既伏其事矣併其妻子爲奴不已甚乎文王無此
刑周公安得有此禮衰世之法復何疑

犬人下士二人府一人史二人賈四人徒十六人

犬司昏戌獸故屬秋犬主防禦故獄曰狴狴犬屬獄
字從犬

犬人掌犬牲凡祭祀共犬牲用牲物伏瘞亦如之凡幾
珥沈辜用曉可也凡相犬牽犬者屬番掌其政治

牲物體色純全伏謂王祭行則伏犬壇上而車轅以去瘞埋物祭地也幾珥猶刳鯀解見士師職沈其物祭川也辜殲牲禳災也騶雜色不必純也犬有三等田犬吠犬食犬相之而知其美惡賈四人之事也牽犬以犬贈送人牽之以獻少儀云犬則執繼其徒十六人之事

司圜中士六人下士十有二人府三人史六人胥十有六人徒百有六十人

圜獄城之園土園象天貴生也

司圜掌收教罷民凡害人者弗使冠飾而加明刑焉任

之以事而收教之能改者上罪三年而舍中罪二年而舍下罪一年而舍其不能改而出國土者殺雖出三年不齒凡國土之刑人也不虧體其罰人也不虧財

罷民明刑解見大司寇任事謂罰作不改而出謂逃亡明刑則不虧體任事則不虧財

按國土刑不虧體罰不虧財非至當之論後世所以多滯獄也凡獄貴斷故雷電並盪先王以明罰勅法仲由片言聖人稱之謂囹圄不虧體不虧財所傷適多不可以訓

掌囚下士十有二人府六人史十有二人徒百有二十

人

掌禁繫刑人。古者五刑不入園土，使身被三木。掌囚守之。

掌囚，掌守盜賊。凡囚者，上罪梏桎，拱而桎；中罪桎梏，下罪梏。王之同族，桎有爵者，桎以待弊罪，及刑殺，告刑于王。奉而適朝，士加明梏，以適市，而刑殺之。凡有爵者，與王之同族，奉而適，甸師氏以待刑殺。

守盜賊，謂守盜賊之見囚者。凡囚，謂非盜賊而犯他罪者。木在項曰梏，在足曰桎，在手曰桎。中罪桎梏，不桎。下罪并不桎。惟梏其頸。王族與有爵者犯罪，或桎。

或桎不并施。奉而適朝。請命于王也。加明梏。謂書所犯之罪于梏。乃適市。施刑。甸師氏。卽天官。甸人在藉田之野。不戮于市。

掌戮下士二人。史一人。徒十有二人。

戮猶辱也。殺之又辱之。尸于市。所以辱也。

掌戮。掌斬殺賊諜而搏之。凡殺其親者。焚之。殺王之親者。辜之。凡殺人者。踣諸市。肆之三日。刑盜于市。凡罪之麗于濫者。亦如之。唯王之同族。與有爵者。殺之于甸師氏。凡軍旅田役。斬殺刑戮。亦如之。墨者。使守門。劓者。使守關。宮者。使守內。刖者。使守圉。髡者。使守積。

斬以鈇鉞殺以刀刃賊叛寇也。謀姦細爲反間者搏
剝通去其衣而磔之賊謀罪大加重刑也。親五服之
親焚旣殺焚其尸辜亦磔也。踣僵尸也。肆陳也。刑謂
五刑。凡刑盜賊與罪人之麗五刑者皆于市以戮辱
之。唯刑王族與貴人于甸師。不于市。凡軍旅田役斬
殺刑戮有罪與盜亦于市。如王族有爵亦于甸師氏。
故曰亦如之。墨守門以下皆戮辱之事。黥面者使守
城門。劓鼻者使守郊關。宮刑者絕人道使守王內則
足者不能行使守園囿。髡髮者無虧損使守積聚。
按肉刑之法嚴矣。其極斬殺之耳。旣斬殺而又搏之。

焚之辜之肆之五刑所不載問其罪唯賊謀爲首雖殺其親者次之此衰世慮敵之意士師八成首邦汙亦以此禮公家不畜刑人大夫弗養故聞殺吳子春秋書之用刑人爲守亦迂闊之法不可信也

司隸中士二人下士十有二人府五人史十人胥二十人徒二百人

隸勞賤之役罪人之沒爲奴者司隸掌之

司隸掌五隸之灋辨其物而掌其政令帥其民而搏盜賊役國中之辱事爲百官積任器凡囚執人之事邦有祭祀賓客喪紀之事則役其煩辱之事掌帥四翟之隸

使之皆服其邦之服執其邦之兵守王宮與野舍之厲禁

五隸卽罪隸以下五也物名色也政令役使之政令帥司隸自帥民卽五隸辱事賤役也積任器收聚官府所用器物囚執人猶今阜隸勾攝罪人也翟狄通四翟猶四夷其邦之服如東南衣布帛西北衣毳裘之類其邦之兵如東南多刀劍西北多弓矢之類野舍謂王行次厲禁遮攔也厲列通

罪隸百有二十人

罪人沒爲奴者此中國之人也

罪隸掌役百官府與凡有守者掌使令之小事凡封國若家牛助爲牽徬其守王宮與其厲禁者如蠻隸之事役百官府爲百官府共役凡有守謂凡有典守之事者皆得役之供使令奔走耳大事非所能供封國封諸侯封家封大夫牛以載什器至封所罪隸助爲牽徬前曰牽側曰徬蠻隸見下

蠻隸百有二十人

此下四隸征討四方俘獲爲奴者蠻南夷

蠻隸掌役校人養馬其在王宮者執其國之兵以守王宮在野外則守厲禁

夏官校人掌馬政役校人爲校人役也

閩隸百有二十人

閩東南之蠻

閩隸掌役畜養鳥而阜蕃教授之掌子則取隸焉

掌子之掌字當移掌役下夏官有掌畜職掌養鳥而阜蕃教授之祭祀共卵鳥此閩隸爲其役者也子卽卵鳥取謂祭祀取鳥子也取隸取之閩隸也鄭謂王立世子取隸謬

按鳥類產于閩地者多故閩人多習鳥性語鳩音

夷隸百二十人

東齋曰夷

夷隸掌役牧人養牛馬與鳥言其守王宮者與其守厲禁者如蠻隸之事

地官有牧人職掌養牛馬而夷隸爲之役東夷人識鳥語如左傳介葛盧辨牛鳴之類與鳥言者聞其聲音諸其性情也

貉陌隸百有二十人

北齋曰貉

貉隸掌役服不氏而養獸而教擾之掌與獸言其守王宮者與其守厲禁者如蠻隸之事

夏官服不氏主養猛獸而貉犛為之役也餘見上
按四翟之隸不及西戎以西正秋方是書好隱如此

周禮完解卷十

郝敬習

秋官司寇下

布憲中士二人下士四人府二人史四人胥四人徒四十人

憲懸示也。主懸布禁令于四方

布憲掌憲邦之刑禁正月之吉執旌節以宣布于四方而憲邦之刑禁以詰四方邦國及其都鄙達于四海凡邦之大事合衆庶則以刑禁號令

刑卽司寇五刑禁卽士師五禁司寇正月布刑于天

下布憲以旌節出布之司寇正歲縣書于象魏布憲亦懸之門閭詰四方者卽大司寇佐王詰四方也鄭作謹非大事合衆庶謂軍旅田役之類號令猶告戒禁殺戮下士二人史一人徒十有二人

掌禁民間相殺

禁殺戮掌司斬殺戮者凡傷人見血而不以告者攘獄者過訟者以告而誅之

司猶察也斬殺戮謂民間私相斬相殺相戮者攘獄謂攘奪罪人卽今拒捕者過訟謂禁遏受害之人使不得赴愬禁殺戮皆以告于司寇士師而誅之

按自此以至伊耆氏二十四職皆除害去惡禁戢肅清之事然多冗瑣迂僻不可盡用

禁暴氏下士六人史三人胥六人徒六十人

掌禁強暴

禁暴氏掌禁庶民之亂暴力正者撝誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出入者則司牧之戮其犯禁者

力正謂以強力正人撝矯通詐也奚女奴隸男奴官官府役使出入恐侵暴良民故司察牧領之野廬氏下士六人胥十有二人徒百有二十人

禁戰野外道路。地官遺人職國野之道。十里有廬。三十里有路室。五十里有候館。所謂野廬也。

野廬氏掌達國道路。至于四畿。比國郊及野之道路。宿息井樹。若有賓客。則令守涂地之人聚櫟之。有相翔者。則誅之。凡道路之舟車輦計互者。敘而行之。凡有節者。及有爵者。則爲之辟。禁野之橫行徑踰者。凡國之大事。比脩除道路者。掌。凡道禁。邦之大師。則令婦道路。且以幾禁。行作不時者。不物者。

國王城道路。卽澮上之道。川上之路。達脩治也。四畿王都四邊。比較視也。宿息。卽路室候館。井以供飯食。

樹以爲藩蔽守涂地之人謂近宿息居民聚樺聚衆
擊柝守護也。樺柝同。兩木相擊。司夜者所執相翔往
來窺伺也。賓在館而窺伺者必姦盜故誅之。擊擊同。
迫隘處舟車互相抵觸則次序使單行也。辟辟行人
橫行徑踰不由道路隄梁者也。國有大事謂王出則
脩除道路比督校也。凡道禁卽橫行徑踰之類。幾微
察也不時早夜行者不物形迹可疑者。

蜡氏下士四人徒四十人

蜡腊通蟲死乾者皆曰腊。人死骹髀亦謂蜡。蜡人掌
收道路骹髀清野之事故屬秋。

蜡氏掌除骴凡國之大祭祀令州里除不蠲禁刑者任人及凶服者以及郊野大師大賓客亦如之若有死於道路者則令埋而置褐焉書其日月焉縣其衣服任器于有地之官以待其人掌凡國之骴禁

骨連肉曰骴除掩埋也不蠲不潔也刑人黥劓之流任人園土罷民罰作任事者凶服衰經也祭則至郊大師賓客則由野達除凶穢以致清潔延吉祥也行入死則埋之立標記其死之日月任器死者所賁用器物有地之官謂本地長吏縣懸以待人謂死者親屬骴禁禁暴骸道路凡禽獸死皆掩之

按鄭訓蜡作蛆云骨肉腐臭蠅蟲所蜡未然蜡者歲終之祭也百蟲至冬槁死古伊耆氏索其神饗之以素服葛帶榛杖送物之終此與伊耆氏二職本皆冬官作者欲以司寇終五官而萬物秋成故以蜡與伊耆屬秋終焉飛鉗之旨也

雍氏下士二人徒八人

雍壅塞壅塞溝瀆陷阱平治道路亦清野之事

雍氏掌溝瀆滄池之禁凡害於國稼者春令爲阱獲溝瀆之利於民者秋冬塞阱杜獲禁山之爲苑澤之沈者水相構曰溝水會曰滄通水曰瀆畜水曰池禁謂蓄

月利失解 卷一 四
洩不時旱澇不均皆害國稼阱獲掩捕禽獸害稼者
塹坑曰阱置柞鄂其中曰獲春作設以禦禽獸秋收
杜塞恐害人也山爲苑專利也澤爲沈竭取也謂沈
毒取魚者

按壅塞溝瀆平治道路亦冬官之事以屬司寇者

萍氏下士二人徒八人

掌水禁萍水草川瀆壅塞則水渟滯防其不潔故以
官主之本亦冬官之事兼掌酒禁取不沈溺意

萍氏掌國之水禁幾酒謹酒禁川游者

幾酒察私造及羣飲之類謹酒用有節飲有禮川游

不用舟楫者

司寤氏下士二人徒八人

主夜禁

司寤氏掌夜時以星分夜以詔夜士夜禁禦晨行者禁宵行者夜遊者

以星分夜謂星見爲夜星沒爲曉也夜士夜行微候者夜中曰宵日未出曰晨禦不使出也禁不使入也行行路遊慢遊

司烜袁氏下士六人徒十有二人

掌火禁烜火明也詩云赫兮烜兮鄭作燬秋水涸物

槁故禁火災莫烈于火九月日躔大火故屬秋官

司烜氏掌以夫遂取明火於日以鑒取明水於月以共祭祀之明盥明燭共明水凡邦之大事共墳燭庭燎中春以木鐸脩火禁于國中軍旅脩火禁邦若屋誅則爲明竈焉

夫遂陽遂卽鑒鏡也以木取火曰燧以鑒取火于日曰陽燧以鑒取水于月曰方諸取日月之水火貴陰陽之真氣也明盥以明火水烹滌盥盛明燭祭之晨陳饌堂東以燭照之明水玄酒也墳燭大燭設于門外庭燎設于廟庭中春二月建卯卯爲大火辰星所

在至三月昏正中故中春應天象脩火禁防風燥也
在軍尤急屋誅謂王族及有爵者刑不卽市誅于甸
師氏明竈罪人夜葬以火穿壙也

條狼氏下士六人胥六人徒六十人

掌執鞭辟道條卽鞭也狼鞭垂貌禁禦之職故屬司
寇鄭云條作滌狼謂道路狼藉不潔

條狼氏掌執鞭以趨辟王出入則八人夾道公則六人
侯伯則四人子男則二人凡誓執鞭以趨於前且命之
誓僕右曰殺誓馭曰車轅惠誓大夫曰敢不關鞭五百
誓師曰三百誓邦之大史曰殺誓小史曰墨

趨辟謂疾走辟開行人警謂有大事警衆殺不用命者殺輶車裂也不關有事不關白師樂官大史小史禮官

按國有常刑而用條狼氏執鞭警衆于義何取馭夫何罪遽至車輶先王無此刑不可以訓大夫不關輒鞭五百鞭箠非所施于大夫公羊遂事之說春秋枝指也曾周公而爲此法與

脩閭氏下士二人史一人徒十有二人

掌市巷之禁閭里巷門

脩閭氏掌比國中宿互櫟者與其國粥育而比其追胥

者而賞罰之禁徑踰者與以兵革趨行者與馳騁於國中者邦有故則令守其閭互唯執節者不幾

宿守夜互桂桓以止衆櫟柝通宿互者所擊粥育通養卒也追胥捕盜也徑踰如越城之類執兵革疾行者寇也車馬馳騁于國中防瞞踐人間互巷門所設桂桓有節者不幾無節則察之

冥氏下士二人徒八人

掌設機穽驅猛獸掩其不見曰冥亦除害之事故屬司寇非獨獸有冥耳凡寇類皆冥事則知所備矣

冥氏掌設弧張爲阱獲以攻猛獸以靈鼓敗之若得其

月利字角 卷一
獸則獻其皮革齒須備

弧張弓弩以機張者觸則機發阱獲解見前靈鼓祭社之鼓獸不入機穽以靈鼓敗之使入借神力也毛存曰皮去曰革須頤下毛備謂爪牙

按冥氏以下職多隱語凡寇之爲狀隱防慮禁禦細至草木蟲蟻銷蒙室萌百蠹盡洗然後可以收清寧之化成秋肅之功

庶氏下士二人徒四人

庶近也不覺曰冥覺之曰庶

庶氏掌除毒蠱以攻說禳之嘉草攻之凡敗蠱則令之

用之

事蠱鬼物能病害人中其毒者攻說其神以禳解之
大祝六祈有攻有說有禳嘉草甘草能解毒攻猶治
也凡攻蠱令之令庶氏也比之責其效也

按冥庶二者蠱寇之情矣曖昧疑似姦宄之狀冥氏
銷其隱庶氏攻其姦

穴氏下士一人徒四人

穴者伏藏之名

穴氏掌攻蟄獸各以其物火之以時獻其珍異皮革

蟄獸謂猛獸藏伏者各以其所欲食物焚穴外誘使

出也珍異如熊蹯狼臠之類

翬治氏下士二人徒八人

翬鳥羽

翬氏掌攻猛鳥各以其物爲媒而拑之以時獻其羽翮猛鳥鷹隼之屬媒誘也置其所欲物于羅誘之使下拑關其足猛鳥之羽可爲矢翼故獻之

按穴者竄伏翬者飛揚擣其巢穴摧其羽毛而後寇可殄也凡寇之情微故司寇之屬多隱語擣發奸宄罅隙盡塞然後光明淨潔內外肅清國治而天下平矣穴氏以下上下鳥獸草木咸若亦猶行古命官之

意與

柞氏下士八人徒二十人

柞木叢生者除木曰柞詩云載芟載柞亦除害之事
柞氏掌攻草木及林麓夏日至令刊陽木而火之冬日
至令剝陰木而水之若欲其化也則春秋變其水火凡
攻木者掌其政令

此治地之法先歲芟刈之後歲乃種之山足曰麓夏
至陽極陰生冬至陰極陽生凡木夏至盛者爲陽于
陰生刊之刊伐也夏木發而燥故宜火焚冬至盛者
爲陰于陽生剝之剝者旣伐削其皮冬氣伏而濕故

月補完解 卷一 十一
宜水漬化化木爲土夏所焚者秋用水漬冬所漬者
春用火焚則化爲糞壤矣

薙替氏下士二人徒二十人

除草曰薙

薙氏掌殺草春始生而萌之夏日至而夷之秋繩而芟
之冬日至而耜之若欲其化也則以水火變之掌凡殺
草之政令

萌之謂春草方生斬其萌芽夏日草長迫地脩之使
平夷繩孕通含實曰繩并實焚之使無遺種冬草宿
根耜耕之以拔其根

按雉柞皆芟除之名而草木異旣柞又雉惟恐不盡
司馬所征討四方遠人而隱慝或潛于肘腋故蒐剔
以至砮族翦友則姦宄情窮而天下攸同此申韓之
意非聖人所以在宥天下之道也
砮族氏下士一人徒二人

石擲曰砮矢殺曰族皆撲滅之名

砮族氏掌覆天鳥之巢以方書十日之號十有二辰之
號十有二月之號十有二歲之號二十有八星之號縣
其巢上則去之

天鳥鵙鵙之屬方版也十日謂甲乙丙丁戊己庚辛

壬癸十二辰謂子丑寅卯辰巳午未申酉戌亥十二
月謂正月娵二月如三月病四月余五月臯六月且
七月相八月壯九月玄十月陽十一月辜十二月涂
十二歲謂寅曰攝提格卯曰單閼辰曰執徐巳曰大
荒落午曰敦牂未曰協洽申曰涒灘酉曰作噩戌曰
闌茂亥曰大淵獻子曰困敦丑曰赤奮若二十八星
角亢氐房心尾箕斗牛女虛危室壁奎婁胃昂畢觜
參井鬼柳星張翼轸

按聖人所謂天祥不在物有德則瑞鴟鴞亦鸞鳳也
不德則殃芝草亦祥穀也天地之間羣生異類何所

不有彼鳥自爲天何預人事而必欲覆其巢且以歲
日月星辰之號書之輒去之不經甚矣作者之志不
盡爲鳥然其言請說非聖人之訓

翦氏下士二人徒二人

翦斷也與湔通澆之曰湔拭之曰拔

翦氏掌除蠹物以攻榮攻之以莽草熏之凡庶蠹之事
蠹物謂蟲穿食人服器者攻榮皆祈名見大祝莽藥
草能殺蟲庶蠹見庶氏庶痊可意

赤友弗氏下士二人徒二人

赤丹砂之屬可驅邪惡友被通拂除也亦去害之意

赤友氏掌除牆屋以廐炭攻之以灰洒毒之凡陳屋除其狸埋蟲

除牆屋除蟲蟻藏屋壁者廐大蛤攻之謂擣廐灰坩之則蟲去洒毒謂以廐灰和水洒而毒之狸蟲埋藏之蟲

按蠹物狸蟲隱伏細微之害皆以法毆之作者自矜周悉而不知牛毛繭絲以防天下之姦心勞計拙日亦不足官其可勝設邪

或氏下士一人徒二人

蜩蝦蟆一名螻蜩亂鳴聒耳有大事則惡之

蜎氏掌去鼃鼃焚牡鞠以灰洒之則死以其煙被之則凡水蟲無聲

鼃卽今食蛙鼃耿鼃鼃屬其鳴怒牡鞠菊不華者

壺涿氏下土一人徒二人

壺陶器汲水者涿探通擊也

壺涿氏掌除水蟲以炮土之鼓毆之以焚石投之若欲殺其神則以牡棒枯午黃象齒而沈之則其神死淵爲陵

水蟲含沙罔象之屬炮土之鼓卽瓦壺焚石火燒石投投水中棒作枯榆也或曰棒或曰樗牡不實者以

樟木爲幹以象齒一縱一橫午貫之沈水中則其神死淵化爲陵高丘曰陵

按善潛莫如水蛙黽亂鳴罔象作祟匿跡深淵以爲人力莫可及矣而牡荊焚石可以制之則天下何事無治法與顧其說甚不經作者變幻骨格以通揣摩之意世儒區區然辨驗事之有無失其旨矣

庭氏下士一人徒二人

庭堂前之地高平淨爽古有大庭氏極治之象也壺涿以下百臺壻除則國中如庭

庭氏掌射國中之天鳥若不見其鳥獸則以救日之弓

與救月之矢夜射之若神也則以大陰之弓與枉矢射之

天鳥獸夜鳴不見形者救日月之弓矢嘗用以救日月者夜望而射之以陰陽殺氣勝之也神謂鳴者爲鬼非鳥獸也大陰之弓卽救月之弓枉矢矢帶火者本星名解見夏官司弓矢職

按秋官至庭氏而百害消除光天化日魍魎絕踪容或有昏夜不見形聞其聲者則以正氣勝之此章之旨變而近于諧讀是書者端冕而聽古樂則失其趣矣天道秋斂而冬藏故二官多隱

銜枚氏下士二人徒八人

枚以箸橫口。繩結于項後。止誼也。

銜枚氏掌司颺國之大祭祀。令禁無颺。軍旅田役。令銜枚。禁詔呼歎鳴於國中者。行歌哭于國中之道者。

颺謹誼。國中詔呼歎鳴歌哭于道。皆驚人惑衆。故禁之。

按秋政森嚴。至于庭氏。則鬼神無夜號者。至于銜枚氏。則朝市無誼誼者。泰平之象觀矣。

伊耆氏下士一人徒二人

伊耆。古帝號。記曰。伊耆氏始爲蜡。故自蜡氏以下。皆

除害之政而終之以伊耆蓋朝野清肅國中如太古
高年曰耆故其事變而爲杖後乃及朝覲貢獻王業
有秋矣

伊耆氏掌國之大祭祀共其杖咸軍旅授有爵者杖共
王之齒杖

老臣七十杖于國八十杖于朝有大祭祀則收其杖
以函盛之咸函通匣也伊耆氏供之在軍旅中凡伍
長下士以上至師帥中大夫皆杖用指麾防奔走也
王之齒杖以優賜臣子之老者

按伊耆于刑官本無涉惟以司寇功成內外清肅民

遷隆古故詩曰上帝耆之又曰耆定爾功耆久也老也物至秋成久且老故齒杖屬之蜡爲息老之祭自伊耆氏始秋行冬令以明五官終于司寇也或云伊耆卽陶唐氏或云神農氏而神農氏近是蜡本農祭子孫以歲終蜡其先祖亦息老之義萬寶告成帝道綦隆故大庭伊耆所以朝諸侯賓九服也冬官無爲以考其成凝亮天工其以此與

大行人中大夫二人小行人下大夫四人司儀上士八人中士十有六人行夫下士三十有二人府四人史八人胥八人徒八十人

行履也禮所以履故掌禮事曰行人掌大禮曰大行人

人
按此以下多諸侯入朝四夷來王之事所以遷皆
為王道之成也其不繫之宗伯何也宗伯主為春生
方長至司馬奮揚于外司寇肅肅于內外無與接之
宇內無隱伏之姦而後萬國攸同四夷咸賓其以二
人屬秋官何也天居西北秋居正西兌與乾運有觀
君之象金氣本肅遇乾而戰森爽安厲故禮主嚴而
大行人屬焉冬官無位亦以此耳自注者以二祭令
嚴肅以去天近也司馬近地故終職方司寇近天故

終大行作者辨方正位陰陽雜家之意

大行人掌大賓之禮及大客之儀以親諸侯春朝諸侯而圖天下之事秋覲以比邦國之功夏宗以陳天下之謨參遇以協諸侯之慮時會以發四方之禁殷同以施天下之政時聘以結諸侯之好殷覲以除邦國之慝間問以諭諸侯之志歸服以交諸侯之福賀慶以贊諸侯之喜致禱以補諸侯之災

賓謂諸侯客謂諸侯之使朝覲宗遇會同聘覲八者解見大宗伯皆諸侯見于天子之名圖比陳協發施六者互言其事間問謂間一歲天子遣人一問諸侯

歸脤謂天子祭祀歸胙于諸侯賀慶謂諸侯有喜慶
天子使人賀禮謂諸侯有凶荒天子使諸侯會財賑
助

以九儀辨諸侯之命等諸臣之爵以同邦國之禮而待
其賓客上公之禮執桓圭九寸纁藉九寸冕服九章建
常九旒樊纓九就貳車九乘介九人禮九牢其朝位賓
主之間九十步立當車軹擯者五人廟中將幣三享王
禮再裸而酢饗禮九獻食禮九舉出入五積三問三勞
諸侯之禮執信圭七寸纁藉七寸冕服七章建常七旒
樊纓七就貳車七乘介七人禮七牢朝位賓主之間七

十步立當前疾擯者四人廟中將幣三享王禮壹裸而酢饗禮七獻食禮七舉出入四積再問再勞諸伯執躬圭其他皆如諸侯之禮諸子執穀璧五寸綵藉五寸冕服五章建常五旒樊纓五就式車五乘介五人禮五牢朝位賓主之間五十步立當車衡擯者三人廟中將幣三享王禮壹裸不酢饗禮五獻食禮五舉出入三積壹問壹勞諸男執蒲璧其他皆如諸子之禮凡大國之孤執皮帛以繼小國之君出入三積不問壹勞朝位當車前不交擯廟中無相以酒禮之其他皆眡小國之君凡諸侯之卿其禮各下其君二等以下及其大夫士皆如

之

九儀九等之禮儀。公侯伯子男孤卿大夫士也。爵命有尊卑。故禮有隆殺。曰圭璧。曰繅藉。曰冕服。曰旂常。曰樊纓。曰貳車。曰介。曰裸。曰饗。曰食。曰積。曰問。曰勞。皆所謂待賓客之禮也。圭有桓信躬。璧有穀蒲。解見大宗伯。繅藻同。以綵絲織爲小裯褥。裹藉圭璧。冕服見春官司服職。常旌旗之總名。旂。旗上綴旒。垂動曰旒。樊纓解見春官巾車職。貳車。副車從行者。介。副也。副賓行禮者。禮九牢。饗餼之禮。牛羊豕三牲具爲一牢。朝位。朝門外止立之位。賓謂諸侯。主謂王賓至立。

大門外主出迎立大門內。摯傳主命介致賓辭。賓主相去其間九十步立。謂賓下車立。軹車旁轂末也。車北向近西。上公立軹東。侯伯立傍車轅前疾。謂車轅曲處比軹稍前。衡謂轅端橫木立當衡比前疾又前也。摯主人迎賓相禮者。其人數各用其賓命數之半。迎九命者五人。迎七命者四人。迎五命者三人。廟中將幣。謂諸侯既行覲禮于朝。王受諸侯享幣于廟。三享猶三獻。王禮謂王廟中設酒以禮諸侯。裸用鬱鬯。酌用圭瓚。敬之如神也。上公再裸。謂王初裸。后亞裸。皆大宗伯攝主。而王與后拜送。若諸侯則惟王一裸。

無后亞賓酌主曰酢。盛禮飲賓曰饗。設飯食賓曰食。九舉謂一食九脩。賓九飯九舉牲體出入謂自來至去來五積。去五積積牢醴米禾芻薪于其館也。問問無恙也。勞慰勤勞也。此數禮凡賓客皆備而多少視爵命爲差。大國之孤謂上公使其孤來聘天子其私覲以皮帛其位繼子男後。朝位當車前又出于衡也。不交擯謂親致辭不敢使其介傳辭于王之擯。廟中無相謂行禮于王廟皆使臣親執事無介爲相以酒禮之謂禮以常酒不用鬱鬯圭瓚其他謂牢禮之類。○按古聖王小心恭儉仁以親諸侯禮以賓邦國其

股肱厚下同心一體之愛而人臣事君冠履之等自不可易也豈有臣子抗禮于君相爲賓主者乎是故覲禮天子不下堂而此節序朝位賓主相見離立遠近之數是天子而出迎諸侯也又云大國之孤立當車前不交擯是天子而出迎陪臣也此東遷以後陵替之風黜天子賓諸侯以爲親萬國先王禮下有制何乃至此鄭據儀禮謂覲于朝享于廟于朝不迎于廟迎今本文未嘗分別朝廟也禮先覲後享擯介通辭正賓主初交朝見之始豈得謂專在廟廟禮旣異朝禮亦宜然如是則九等各自爲禮煩瑣參差豈成

朝常若使在朝禮同。在廟禮異。是廟朝二體。曲爲之解。未見其當。

邦畿方千里。其外方五百里。謂之侯服。歲壹見。其貢祀物。又其外方五百里。謂之甸服。二歲壹見。其貢壤物。又其外方五百里。謂之男服。三歲壹見。其貢器物。又其外方五百里。謂之采服。四歲壹見。其貢服物。又其外方五百里。謂之衛服。五歲壹見。其貢材物。又其外方五百里。謂之要服。六歲壹見。其貢貨物。九州之外。謂之蕃國。世壹見。各以其所貴實爲摯。王之所以撫邦國諸侯者。歲徧存。三歲徧覲。五歲徧省。七歲屬象胥。諭言語。協辭命。

九歲屬瞽史。論書名。聽聲音。十有一歲。達瑞節。同度量。成牢禮。同數器。脩湊則十有二歲。王巡守殷國。

九服說見大司馬。及職方氏。要服。又謂蠻服。要者。約束之名。自王畿至要服三千里。公侯伯子男封焉。見謂入見天子。自侯服外。每五百里而間一歲。爲期以節其勞也。禮物。犧牲之屬。殯物。絲麻之屬。器物。尊彝之屬。服物。皮幣之屬。材物。金錫竹木之屬。貨物。珠玉龜貝之屬。蕃。最也。蕃國。卽司馬職方所謂夷服。鎮服。蕃服也。世一見。謂其君繼世新立。一來見王。歲徧。謂王每歲遣人周徧存問。覲省。皆視也。屬。召集也。象。胥。

通四方言語之官。瞽。樂官。能察聲律者。史。大小史。禮官。掌文書。書名。文字也。諭。教也。聽。瞽。聽。瑞。六瑞。見大宗伯職。節。六節。見地官掌節職。度。謂分寸尺丈引量。謂侖合升斗斛。牢。禮。謂行禮牲牢多寡之等。成。平也。言不得相踰越也。數。器。節。五權。五度。五量。如百黍爲銖。二十四銖爲兩。十六兩爲斤。三十斤爲鈞。四鈞爲石之類。濫。則。卽。大宰八濫。八則之類。十二歲六服來見。再周矣。王乃一親巡守。殷。衆也。所至之方。諸侯皆朝于方嶽下。曰。殷。

按職方旣屬司馬而行人司儀又屬司寇何也。四方

遠不來庭則有討大司馬主之諸侯來朝不恭則有刑大司寇主之

凡諸侯之王事辨其位正其等協其禮賓而見之若有大喪則詔相諸侯之禮若有四方之大事則受其幣聽其辭凡諸侯之邦交歲相問也殷相聘也世相朝也

諸侯之王事謂諸侯以歲事來王辨其位九十七步之類正其等冕服旂常貳車之類協其禮牢禮饗食問勞之禮賓而見之謂以賓禮見于天子皆大行人之事四方之大事謂諸侯有兵寇來告急邦交謂諸侯友邦自相交歲常歲殷衆也世謂繼世初立相

朝謂友邦自相朝賀

小行人掌邦國賓客之禮籍以待四方之使者。今諸侯春入貢秋獻功。王親受之。各以其國之籍禮之。凡諸侯入王則逆勞于畿。及郊勞。胝館。將幣爲承而擯。凡四方之使者。大客則擯。小客則受其幣而聽其辭。

小行人職見上下大夫四人。禮籍謂禮著在典籍者。四方之使謂諸侯使臣。春入貢謂歲貢。冬行春始達。獻功獻其考課之功。以秋爲期。國之籍卽大行人公侯伯等國之禮著爲令甲者。入王入見王。逆勞于畿。王使人迎勞于境上。及郊勞。至近郊又勞也。胝館將

至視其館舍將幣謂諸侯享王幣于廟承謂次擯大客大國之使王親見之則小行人爲擯小客小國之使則小行人受其幣聽其來見之辭以入告于王

使適四方協九儀賓客之禮朝覲宗遇會同君之禮也存覲省聘問臣之禮也達天下之六節山國用虎節土國用人節澤國用龍節皆以金爲之道路用旌節門關用符節都鄙用管節皆以竹爲之成六瑞王用璜圭公用桓圭侯用信圭伯用躬圭子用穀璧男用蒲璧合六幣圭以馬璋以皮璧以帛琮以錦琥以繡璜以黼此六物者以和諸侯之好故若國札喪則令賻補之若國凶

荒則令賙委之。若國師役則令槁稿禮之。若國有福事則令慶賀之。若國有禍哉則令哀弔之。凡此五物者治其事故及其萬民之利害爲一書。其禮俗政事教治刑禁之逆順爲一書。其悖逆暴亂作慝猶犯令者爲一書。其札喪凶荒厄貧爲一書。其康樂和親安平爲一書。凡此五物者每國辨異之以反命于王。以周知天下之故。此章皆使于四方之事所至之國則爲之合九等賓客之禮。朝覲六者諸侯所以見天子。曰君禮存覲五者天子使人于諸侯。諸侯使其臣于天子。曰臣禮。六節解見司徒掌節之職。虎人龍三者用于天下旌符

管三者用于國中掌節職云都鄙用角節蓋王國都鄙用角而侯國都鄙用管管竹也達者齊其法式六瑞與圭璋琮琥等解見大宗伯六幣諸侯所以享也先執圭璋等將命陳馬皮等于外上公用圭璋侯伯用璧琮子男用琥璜圭合而馬全璋半而皮死各以類合也璧圓而帛純琮錦琥繡皆以文合也璜半璧黼斧文以斷合也諸侯享天子列國自相享皆然通情曰好通事曰故助喪曰賻助貧曰補濟飢曰賙送遺曰委賞勞曰犒犒通合助曰禮稱贊曰慶加物曰賀哭死曰哀悲生曰弔事故有事變故五書皆採風

問俗之事作慝爲惡也猶謀也

司儀掌九儀之賓客擯相之禮以詔儀容辭令揖讓之節將合諸侯則令爲壇三成宮旁一門詔王儀南向見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如其禮亦如之王燕則諸侯毛

司儀職見大行人上士八人中士十六人詔詔王合諸侯謂會同爲壇築壇郊外三成三級宮卽壇場旁一門謂每方一門如考工記匠人營國旁三門是也南向王登壇南面進諸侯見之揖拱手推讓土揖下

其手象地也。庶姓非親者時揖平其手。象四時也。異姓謂昏姻家。語夫子妻南容以爲異姓。天揖上其手。象天同姓。謂宗族。擯之。擯迎之。使登各以其禮。卽三等之禮等。謂壇分尊卑三級。序立將幣。謂奠幣各于其級。禮謂王以秬鬯裸禮之。亦各于其級。王燕謂旣朝賜燕毛。謂尚齒。髮白者居上。

按上下之禮莫嚴于朝廷。未聞天子會同諸侯而野合者也。築壇郊外。歃血同盟。五霸狙詐之術。作者附會其事。以累文武周公。不經甚矣。若使會同必于郊外。朝廷不爲虛位乎。中衰以後之王。忍辱媚強臣如

晉重耳河陽踐土之事則然成康盛時斷乎無是禮
矣

凡諸公相爲賓主國五積三問皆三辭拜受皆旅擯再
勞三辭三揖登拜受拜送主君郊勞交擯三辭車逆拜
辱三揖三辭拜受車送三還再拜致館亦如之致殯如
致積之禮及將幣交擯三辭車逆拜辱賓車進答拜三
揖三讓每門止一相及廟唯上相入賓三揖三讓登再
拜授幣賓拜送幣每事如初賓亦如之及出車送三請
三進再拜賓三還三辭告辟致饗餼還主饗食致贈郊
送皆如將幣之儀賓之拜禮拜饗餼拜饗食賓繼主君

皆如王國之禮諸侯諸伯諸子諸男之相爲賓也各以其禮相待也如諸公之儀

此諸侯相朝之禮相爲賓自相朝也致米芻于賓館曰積至則積止則問行則勞皆主君使卿大夫爲之五積出入皆五積三問自初來訖去之數三辭賓讓不敢當也拜受敬主君之命也皆旅賁謂五積三問之來皆賓爲主陳賁以迎也旅猶陳也再勞謂賓初至遠郊主君兩次使人迎勞賓三辭乃三揖進使臣登所舍之堂拜受勞禮使者歸賓拜送此以上主君使人致積問勞之禮也賓至近郊主君親出郊勞賓

爲主陳摺迎主君爲賓傳辭告至賓傳辭請事主傳辭告迎勞是謂交摺三辭賓以主君親來出舍門登車示將遠迎主君下車拜其遠辱賓三揖主君入賓三辭不敢當而後拜受其勞禮主君退賓登車示將遠送主君三還辭賓乃再拜送此以上主君親郊勞賓之禮也致館謂賓至主君親致館亦如郊勞之禮致飧謂賓至館主君使臣饋食亦如使臣致五積之禮將幣謂賓奉幣享主君則主君陳摺賓陳介交傳三辭主君出門登車示遠迎見賓下車拜辱臨賓車進答拜主三揖進賓賓三讓入門每門主君之摺與

賓之介各一人相禮以詔揖讓及入廟成禮唯上相
一人入古者享禮皆于祖廟示敬也賓不敢當三揖
三讓及登堂主君拜賓至賓授幣于主君拜送然後
卽席裸酢交語每事皆如初之揖讓拜授拜送也賓
亦如之揖讓拜同也享幣畢賓出主君登車示欲遠
送三請賓前主車三進再拜送賓賓三還三辭每主
君一請賓必一還一辭告罷此以上皆將幣之禮也
熟食曰饗生物曰餼致謂主君致于賓還圭賓以圭
通信主君受而復還之饗以酒飲賓食以飯食賓致
贈賓將去贈以財郊送賓出郊主君親送六者惟饗

食賓來餘皆主君往其送迎揖讓拜送皆如將幣之儀賓之拜禮謂賓將去造主君朝拜饗餼饗食主君往送凡賓受主君郊勞致館饗餼還主贈送賓亦繼爲主亦有幣帛皮馬酒饌之設皆如主君之禮所謂禮尚往來迭爲賓主者也此以上皆諸公之禮其侯伯子男相賓亦各以其禮如諸公之儀但隆殺各自有等耳

諸公之臣相爲國客則三積皆三辭拜受及大夫郊勞旅擯三辭拜辱三讓登聽命下拜登受賓使者如初之儀及退拜送致館如初之儀及將幣旅擯三辭拜逆客

辟三揖。每門止一相。及廟。唯君相入。三讓。客登拜。客三辟。授幣下出。每事如初之儀。及禮私面。私獻皆再拜稽首。君答拜出。及中門之外。問君。客再拜對。君拜。客辟而對。君問大夫。客對。君勞客。客再拜稽首。君答拜。客趨辟。致饗餼。如勞之禮。饗食還主。如將幣之儀。君館客。客辟。介受命。遂送。客從拜辱于朝。明日。客拜禮。賜。遂行。如入之積。凡侯伯子男之臣。以其國之爵。相爲客而相禮。其儀亦如之。

此敘諸侯使其臣交相聘問之禮。諸公之臣。謂公使其臣聘鄰國之公。則使臣爲主國之客。三積者。上公

五積臣下其君二等主君使人致積客皆三辭不敢當而後拜受客至近郊主君使大夫迎勞客旅擯不交三辭而後拜辱臨客三讓而後登館舍之堂聽使者傳主君命乃下堂拜命復登堂受其勞禮也賓使者謂以束帛之類賓禮主君之使其相辭讓亦如初行勞禮之儀使者退賓拜送此郊勞之禮也客至主君使人致館其儀亦如郊勞及客執圭行禮將幣于主君主君旅擯客親對三辭主君拜迎客避不敢當主君三揖客入每門主客止一相及廟客之相不入唯主君相入客三讓然後登堂主君拜客客退避者

三授幣于主君。下堂而出。每事謂將幣之時。執玉奠幣。非一事。皆如三讓三辟。下出之儀也。及禮。謂主君以酒禮客。私面。私覲也。私獻。私饗也。此三禮。客皆再拜稽首。行臣禮。主君但答拜。不答稽首。出。謂禮畢。客退。主君送客出。及中門外。大門內。主君問客以其君之起居。客再拜對。重君也。主君亦拜。拜聘君也。客且辟且對。主君又問國之大夫。客對。不拜。主君慰勞客。遠來則客再拜稽首謝。主君答拜。則客趨辟。不敢當。此以上皆將幣之禮也。主君使人致饗餼于館。客辭讓。下拜。登受。皆如郊勞之禮。主君饗客。食客還圭。客

辭讓辟拜皆如將幣之儀客將去主君就館親省之
客辟不敢當以其介受命君遂拜送客客卽從主君
往拜謝于朝明日客又往拜主君禮賜遂行主君以
積送亦如入之三積也此以上皆公之禮侯伯子男
之臣相爲客同而降殺各以等

凡四方之賓客禮儀辭命餼牢賜獻以二等從其爵而
上下之凡賓客送逆同禮凡諸侯之交各稱其邦而爲
之幣以其幣爲之禮凡行人之儀不朝不夕不正其主
面亦不背客

此總敘行人相禮之事二等卽大行人職云諸侯之

卿其禮各降其君二等。凡降殺以兩爲差。爵尊者加二等。爵卑者減二等。所謂上下也。送逆同禮。謂始迎終送禮如一。諸侯之國。大者幣重。小者幣殺。其主國亦量其豐殺。以禮報之。行人之儀。謂相禮傳辭之時。不正東向。不正西向。不正對主君。亦不背客。隨賓主周旋也。

行。夫掌邦國傳遽之小事。雖惡而無禮者。凡其使也。必以旌節。雖道有難而不時。必遽。居於其國。則掌行人之勞辱事焉。使則介之。

載見。大行人下士三十二人也。所掌乘傳急遽之小

事吉事曰蠆凶事曰惡無禮謂急遽單行非慶恤大禮無紹介輔行則必以旌節通路遇厄難失期務求必達其在王國大小行人煩勞卑屈之事行夫任之大小行人出使則行夫爲之介

環人中士四人史四人胥四人徒四十人

環人解見司馬之屬主往來循環偵探軍中用之有四方境外客至亦用之故司寇重設焉

環人掌送逆邦國之通賓客以路節達諸四方舍則授館令聚橐有任器則令環之凡門關無幾送逆及疆四方賓客往來交通來則逆之去則送之路節旌節

四方王畿境上舍客舍夜令野廬氏聚櫟因其任器
環守之環人旌節所過關門無幾妨稽滯也及疆謂
迎送及境而止

接賓客入境使人環守送逆妨內外交通洩機事也
亂世猜忌之政道路迎送侯人野廬之設足矣

象胥每翟上士一人中士二人下士八人徒二十人
掌通四夷言語翟狄通

象胥掌蠻夷閩貉戎狄之國使掌傳王之言而諭說焉
以和親之若以時入賓則協其禮與其辭言傳之凡其
出入送逆之禮節幣帛辭令而賓相之凡國之大喪詔

相國客之禮儀而正其位。凡軍旅會同受國客幣而賓禮之。凡作事王之大事諸侯次事卿次事大夫次事士士下事庶子。

國使蕃國之使其人言語不通象胥傳王言曉諭解說其情以和親之。若其君繼世來賓教以中國之儀與奉上之辭因譯其辭而傳于王。凡王國送迎有禮節賜予有幣帛誥諭有辭令皆以賓禮贊相之。若國有大喪使來弔則詔相其禮儀正其朝位若國有軍旅會同奉幣來問則受其幣以賓禮禮之作事作四夷之事王之大事謂征討四夷則使諸侯次事謂威

讓之令文詰之辭量其輕重或使大夫或使士或使國之庶子庶子謂卿大夫之子侍衛者也

掌客上士二人下士四人府一人史二人胥二人徒二十人

掌凡賓客之饋獻

掌客掌四方賓客之牢禮餼獻飲食之等數與其政治王合諸侯而饗禮則具十有二牢庶具百物備諸侯長十有再獻王巡守殷國則國君膳以牲犢令百官百姓皆具從者三公眡上公之禮卿眡侯伯之禮大夫眡子男之禮士眡諸侯之卿禮庶子壹眡其大夫之禮

王合諸侯謂大會同也。饗禮謂王大饗諸侯之禮。上物不過十二天之數也。羣侯咸在故用盛禮。諸侯長謂九命作伯者十有再獻優異之殷國衆諸侯之國。國君卽諸侯膳牲用犢牛。事王如事天帝也。百官皆具備使令也。百牲皆具備膳羞也。令掌客令也。從者王從行者王之內臣。比外諸侯禮謂牢禮飲食之數。庶子世蔭有尊卑皆王衛士故皆以諸侯大夫禮禮之。

按王饗諸侯用十有二牢十有再獻禮數極矣。若諸侯饗天子又何加焉。凡是書稱天子所以降禮諸侯。

者往往過當其作于周衰以後諸侯強僭之日無疑也

凡諸侯之禮上公五積皆胝餼牽三問皆脩羣介行人宰史皆有牢餼五牢食四十簋十豆四十銅四十有二壺四十鼎簋十有二牲膳三十有六皆陳饗餼九牢其死如餼之陳牽四牢米百有二十筥醯醢百有二十饔車皆陳車米胝生牢牢十車車乘有五簋車禾胝死牢牢十車車三秬杜芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之凡介行人宰史皆有餼饗餼以其爵等爲之牢禮之陳數唯

上介有禽獻。夫人致禮。八壺八豆八簋。膳大牢。致饗大牢。食大牢。卿皆見以羔。膳大牢。

此天子待上公之禮。賓入境。主君致積。上公五積。皆視餼。牽餼熟食。賓始至。致餼。有牲牢。皆殺之。積則生牲。牽致之。上公餼五牢。積視餼。牽五積。用二十五牢。牛羊豕七十五。牽也。問問起居。用脯脩。羣介羣臣爲輔行者。行人掌禮。宰掌食。史掌文書。皆有牢禮。敬賓以及從者也。餼致餼。其牲體五牢。其庶羞可食者四十簋。盛稻粱十。豆盛菹醢亦四十。鉶鼎盛和羹四十。有二壺盛酒漿四十。鼎盛牲肉。簋盛黍稷各十。有二

牲作腥生肉三十有六皆陳設致之此飧禮之數也
賓既見致饗餼上公九牢牛羊豕共二十七內五牢
已殺如飧之五牢其四牢生牽米百二十筥醯醢百
二十罍車載米禾皆陳設之車米視生牢每生牢一
米車十上公生牢四則米車四十每車米秉有五簋
十斗曰斛十六斗曰簋十六斛曰秉是一車載米二
十四斛一牢十車爲米二百四十斛四牢四十車則
上公米九百六十斛也車禾之數視死牢每死牢一
禾車十上公死牢五禾車五十每車禾三秬十束曰
秬是每車禾三十束一牢十車禾三百束五牢五十

車則上公共禾一千五百束也。芻以飼馬，薪以供爨。其數倍禾。是芻薪共六千束也。乘禽羣處之禽，鴛鴨之類，日九十雙，每日一百八十隻。殷膳，盛饌也。君日一舉，每日饋一大牢。自始至及歸，日皆然饗以醴，食以飯，燕以酒。三者各三，皆上公之禮。主君若有故，不得親，則以幣致。弗饗，燕以酬幣致之。弗食，以侑幣致之。凡介以下，餼饗餼，卽上文所謂皆有牢，其數各以爵命爲差。唯上介日有乘禽之獻，餘否。夫人主君夫人亦致禮于賓，有壺有豆有蓬，以八爲數。有膳有饗，有食皆用大牢。卿主國之卿往見賓于館，羔爲摯，獻

膳于賓亦以大牢

按此文牲牢米禾芻薪之數一公之餽始至用牛羊豕一百一十七頭其每日在館禽獻殷膳饗食燕費及夫人與卿之饋尚不與焉一餽之費用米九百六十石禾芻薪共七千五百束勿論經費不支卽賓館何地可容任載之車多至二百九十乘填塞街衢矣況納之館舍乎其誇誕不足據也

侯伯四積皆抵餼牽再問皆脩餼四牢食三十有二簋八豆三十有二鉶二十有八壺三十有二鼎簠十有二腥二十有七皆陳饔餼七牢其死牢如餼之陳牽三牢

米百石。醯醢百。皆陳米三十車。禾四十車。芻薪倍禾。皆陳。乘禽日七十雙。設膳大牢。三饗再食再燕。凡介行人宰史皆有餼。饗餼以其爵等爲之禮。唯上介有禽。獻夫人致禮。八壺八豆八簋。膳大牢。致饗大牢。卿皆見以羔膳。特牛。

此待侯伯之禮。解見上。其數少殺于公。特牛一牛也。子男三積。皆祗餼。牽壹間以脩。餼三牢。食二十有四簋。六豆二十有四。鉶十有八。壺二十有四。鼎簋十有二。牲十有八。皆陳。饗餼五牢。其死牢如餼之陳。牽二牢。米八十石。醯醢八十。皆陳。米二十車。禾三十車。芻薪倍。

禾皆陳。乘禽日五十雙。壹饗壹食壹燕。凡介行人宰史皆有餼饗餼以其爵等爲之禮。唯上介有禽獻。夫人致禮六壺六豆六簋。膳眡致饗。親見句卿皆膳特牛。

此待子男之禮。膳視致饗。謂膳饗皆特牛。親見謂主國卿大夫有親詣館見賓者。卿則以特牛致膳云。皆槩上夫人致膳饗同。

凡諸侯之卿大夫士爲國客。則如其介之禮以待之。凡禮賓客。國新殺韋禮。凶荒殺禮。札喪殺禮。禍裁殺禮。在野外殺禮。凡賓客死。致禮以喪用。賓客有喪。唯芻稍之。受遭主國之喪。不受饗食。受牲禮。

爲國客謂來聘問介之禮謂從其君來之禮客介雖異論將以待之同國新主國新建殺滅損在野外無備也賓客死主君所致禮取供喪具之用不拘常禮之數賓客在本國聞彼國喪主君餽如常賓不盡受唯芻蕘稍康供人畜者受之若賓客過主國有喪于主國饗食鼎豆之類皆不受惟牲肉受之鄭云牲當作脰

按是職言饗餼牲牢米禾薪芻百物充牣所謂正得秋而萬寶成義之和而爲利也兌金爲口爲悅飲食醉飽人心歡悅太平功成所以爲五官之終也世儒

疑錯亂議改訂非作者之意

掌訝中士八人府二人史四人胥四人徒四十人

訝迎也迎賓致辭曰訝覓象

掌訝掌邦國之等籍以待賓客若將有國賓客至則戒官脩委積與士逆賓于疆爲前驅而入及宿則令聚櫟及委則致積至于國賓入館次于舍門外待事于客及將幣爲前驅至于朝詔其位入復及退亦如之凡賓客之治令訝訝治之凡從者出則使人道之及歸送亦如之凡賓客諸侯有卿訝卿有大夫訝大夫有士訝士皆有訝凡訝者賓客至而往詔相其事而掌其治令

掌九儀之差等載于典籍者以其籍之等爲待賓之隆殺戒官預戒有司道路三十里有委五十里有積士訝士宿未至國宿于野致積以王命致牢廩之類詔其位告賓以朝見所立之位入復告王以賓至退亦如之亦告也賓客在館凡有所欲治之事訝爲治之如求取之類從者賓客之從者凡迎賓之禮以卑迎尊故卿訝諸侯大夫訝卿

掌交中士八人府二人史四人徒三十有二人

掌通好之事

掌交掌以節與幣巡邦國之諸侯及其萬民之所聚者

道王之德意志慮使咸知王之好惡辟韙行之使和諸侯之好遠萬民之說悅掌邦國之通事而結其交好以諭九稅之利九禮之親九牧之維九禁之難九戎之威萬民所聚謂都邑城市王之好惡謂所好在善所惡在不善所惡使民避所好使民行邦國之通事謂朝聘之事九稅卽九賦九禮卽九儀九牧卽九州九禁卽九灋九戎卽九伐凡言九者陽數之極所以爲秋官之成也

掌察四方中士八人史四人徒十有六人

察四方賓客來朝者防姦慝也

掌察

事關

掌貨賄下士十有六人史四人徒三十有二人

掌四方來朝之人以貨賄貿易者

掌貨賄

事關

朝大夫每國上士二人下士四人府一人史二人庶子
八人徒二十人

主王畿內都家之事國都家之食邑庶子都家世子
侍從之屬

朝大夫掌都家之國治日朝以聽國事故以告其君長
國有政令則令其朝大夫凡都家之治於國者必因其
朝大夫然後聽之唯大事弗因凡都家之治有不及者
則誅其朝大夫在軍旅則誅其有司

都家之國治謂都家事關白王國者日朝謂每日常
在王朝聽受王國政事當行之故以告其都家之君
與治事之長使奉行也王國有政令施于都家令其
朝大夫使轉令都家之吏民都家有所治事上王國
必朝大夫爲之通然後受而聽之唯大事非朝大夫
所能主者如軍旅之類則直達治有不及謂廢閭王

命以朝大夫不能催督故誅入之若軍旅失事則誅都家有司謂都司馬家司馬

都則中士一人下士二人府一人史二人庶子四人徒八十人

則法也徒多于朝大夫者都多故也

都則

事闕

都士中士二人下士四人府二人史四人胥四人徒四十人家士亦如之

掌都家之獄訟

都士

事關

家士

事關

右秋官之屬六十有六職卿一人大夫六人上士十
二人中士一百三十五人下士一百六十人府七十
四人史一百四十七人胥一百四十三人徒二千七
十人通計二千七百四十有八人外象胥每翟上士
一人共上士四人朝大夫每國上士二人下士四人
府史以下共二十五人又犬賁四人皆不與焉五官

之人。此其獨少者矣。通計天官之屬六十有三。其人三千八百二十有奇。地官之屬七十有八。其人二萬七千四百八十有奇。春官之屬七十。其人三千四百六十有奇。夏官之屬七十。其人三萬二千四百三十有奇。秋官之屬六十有六。其人二千七百四十有奇。職存事亡者。又三百四十有七。共人七萬有奇。他如天官世婦九嬪之類。地官市肆山澤虞衡之類。春官旄舞男巫女巫巫之類。夏官校人趣馬之類。秋官朝大夫之類。無定數者。尚不與。夫以王畿之地。不過千里。分封王公子弟。卿大夫食邑外。十萬之衆。日聚而食。

之歲入亦不足矣昔人謂之瀆亂不驗誠然